



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8 Yangia anidakangma : Tir Yimiyim

tiryimiyim@aolima

tir yimiyim

TAPAK 3

**Marco Reus-i tenangzüktepba tasen yanglushi**

**Karnataka election sülen opposition lenirtem ajurutsü: Nitish Kumar**



VOL. XX NO. 197 (ADOK 197)

DIMAPUR

AMUNGNÜ (SUNDAY)

RONGCHII (APRIL) 30, 2023

₹ 5.00

## Raj Bhawan Kohima nung Maan Ki Baat sayutsü

**Dimapur, April 29, 2023 (TYO):** Deobarnü Kohima Raj Bhawan nung Prime Minister Narendra Modi indang Mann Ki Baat anagaktsütsü atema renemogo.

Deobarnep 11:00 ako nungi Prime Minister Narendra Modi-i 100 buba Mann Ki Baat nung jembitsü.

Iba sentong nung IPR Advisor Imkong L Imchen-i tongti tesemdang ka ama shilem agitsü.

Ministry of Information & Broadcasting-i linük nung Raj Bhawan ajak nung 100 buba Mann Ki Baat atema sentong ayonga agitsü.

Prime Minister Narendra Modi-i pa indang Mann Ki Baat onüktem nung tetshir Nagaland nungi Padma award angurtem Moa Subong (Dimapur) aser Neihunuo Sorhie (Kohima) nati anir tangartem iba sentong nung adentsü jaokogo.

Maneni, handloom &

handicraft sector nungi artisans, sorkar department nung tongti ketdangsürtem aser lenirtem iba sentong nung adentsü.

Raj Bhawan indang Durbar Hall nung LED screen tulu ka renemogo. Doordarshan Kendra, Kohima aser All India Radio, Kohima ajanga iba sentong telecasting/broadcasting asütsü aser DIPR-ia YouTube nung webcast asütsü.

Ministry of Information & Broadcasting kübok Central Bureau of Communication, Kohima-i Mann Ki Baat indang mini photo exhibition ka sayutsü renema lir.

United Nations headquarters nunga Prime Minister Narendra Modi indang radio programme 'Mann Ki Baat' live sayutsü.

UN headquarters nung Trusteeship Council Chamber nung 100 buba "Mann Ki Baat" sayutsü ta Permanent Mission of India to the UN-i tanü metetdaksü.

## Churachandpur nung tensa mesüngjemer

**Imphal, April 29, 2023 (Agencies):** Manipur kübok Churachandpur district nung Honibar tashi tensa mejungi dang lir aser yasüng ayaterm mejangjaba nisungtemi Forest Range Officer ki rongdoktsüogo.

Iba lendong ya Tuibong tesem nung atalok aser sen lakh aika alangba osettsüset aser kulikaket aika mitsü küma rongdokogo.

Tensa azüoktsü atema Churachandpur district administration-i district ajungalen night curfew ozüng agüogo. Iba ya nikongdang 5:00 ako nungi anepdang 5:00 ako tashi ta aser Honibar nikongdang nungi tenzükogo.

District administration-isa CrPC indang Section 144 kübok tenokdangbatem agütsüogo. Maneni tanga tetuyuba ka magütsü tashi Churachandpur district nung mobile internet services shibangtsü.

Manipur nung opposition Congress-i Bharatiya Janata Party (BJP)-i aniba state sorkar aitsür.

Manipur nung BJP-i lisopur temeten anema inyaksangshir ta Congress president Mallikarjun Kharge-i Honibarnü ashi.

"BJP-i yimsü asüba Manipur nung tensa kanga mejungi lir. Kechi onük südir süaka ozüng alema meinyaktsüla. Double-engine sorkar kübok Manipur nung Law & Order mali kümogo" ta pai metetdaksü.

"BJP-i lisopur temetentem ajembanger aser agientsü meranger. Onoki iba inyakyim khukhua aitsür" ta Kharge-isa ashi.

Hokolbar aonung Churachandpur jila nung security forces-i batons, tear gas aser rubber bullets amshi.

Indigenous Tribal Leaders Forum (ITLF)-i mokdang ayonga agiba sülen sepaitemi nisung kar tepset aser aika yirutsü ta ta nisungtemi ashir.

"Manipur nung BJP indang chichiba tejak sayur" ta Congress general secretary Jairam Ramesh-i ashi.

"Team Modi ajungai Karnataka nung tenük yoker saka Manipur nung Churachandpur ya war zone ka ama kümogo. Manipur nung BJP sorkar akümba sülen küm ka shi lir iba tensa ya ajurur. Double engine sorkar loksar" ta Ramesh-i Twitter nung metetdaksü.

## May 11 nü Assam sorkari mapa lakh 1 agütsütsü

**Guwahati, April 29, 2023 (Agencies):** Assam state sorkari May 11, 2023 nü nübertem nem mapa lakh 1 agütsütsü ta Minister Jayanta Mallabuarah-i ashi.

Assam sorkar kümteter küm ana ajungba anogo nung appointment letters agütsütsü ta pai ashi.

"May 11 nü Assam sorkar küm ana ajungba tenüng nung nisung lakh 1 nem appointment letters agütsütsü" ta Honibarnü Minister Mallabuarah-i Guwahati nung osangbener dang ashi.

Iba sentong nung Union Home Minister Amit Shah adentsü ta paisa ashi.

State sorkari nübertem nem mapa lakh 1 agütsütsü atema mapa inyakdar ta taküm March ita Assam Finance Minister Anjanta Neog-i shia liasü.

BJP-i election nung March 31, 2022 tashi nung mapa lakh 1 agütsütsü nangzükba indang Independent MLA Akhil Gogoi-i asüngdangdang Neog-i iba osang metetdaksü.

## CM Neiphiu Rio-i Pungro aser Kiphire sendang

**Dimapur, April 29, 2023 (TYO):** Chief Minister Neiphiu Rio-i Tizu River nung Hydro project 42 M/W mapa inyakba repranga süidang Pungro temeket nung aliba lenirtem, GBs aser sorkar ketdangsürtem den senden ka amen.

CM Rio-i nübertem dang külemi yariteptsü tangatetba alitsü ayongzük aser sorkari nübertem asoshi terenlok bener arutsü atema inyakba olen lemsatop.

"Nagaland nung backward areas nung alirtem ajungkettsü atema sorkar mapa nung shilem wazüka yutsür anungji nübertemi iba tajangzük agitsüla" ta pai ashi.

Pungro nung Hydro project 42 M/W maparen ka akokba tashi tekaratiba nung inyaker aser iba ajanga rongsenketzung jenjang tajungba akümtsü. Maneni Pungro nung town hall

aser multi-purpose hall yanglutsü nungdak ta CM Rio-isa shisem.

"Asenok taküm nung shisaliok ya kanga tongtipang aser iba ajanga dang alima den tokteptettsü" ta Power & Parliamentary Affairs Minister K.G. Kenye-ia ashi.

"Nübertem tsüngda amalitep alitsüla aser nisung ka taküm nung terenlok ya kanga tongtipang lir. Asenok longjemra terenlok angutsü anungji nübertem ajak ka akümtsüla" ta paisa ayongzük.

Iba sentong nung Fire & Emergency Services, Home Guard & Civil Defence Advisor S. Kiusumew Yimchunger-ia Delimitation 2026 dak sendakba olen ka jembia.

Tarutsü putu ajungtsü atema lenirtem aser nübertemi Delimitation 2026 atema tebilemtsü khuret abentsüla, ta pai ashi.

Kasa anogo nung CM Rio-isa

Kiphire kübok Zinki River nung Zinki Bailey Bridge lapoktsü.

"Iba apu yangluba ajanga nübertem kanga tejakleni aotsü" ta pai ashi.

"DUDA ajanga education aser health sectors renloktsü atema state sorkari Rs.180 crores renema lir aser iba atema departmental HODs den olemteptsü aser senotsü timi amshitsüla" ta CM Rio-isa ashi.

"Feet 14 tulu aser feet 160 talang apu ya Rs 15 crore endoka yanglu" ta Executive Engineer DUDA Er. N. Imti Chang-i ashi.

Iba sentong nung Fire & Emergency Services, Home Guard and Civil Defence Advisor S. Kiusumew Yimchunger; Geology & Mining DUDA Advisor Chingang Konyak, Tutheze Village Council; USLP aser USSC lenirtemia o tatsütsü jembia liasü.

## Kohima Aor Telungjem yimkong mungdang mungogo



Kohima Aor Telungjem (KAT) yimkong mungdang nung tongti tejaoker Minister Metsübo Jamir-i o jembidang agiba noksa ka angur.

**Mokokchung, April 29, 2023 (TYO):** Aor telungjem yimti balala nung tenteta lir, item yimti Aor telungjem atema dang masü saka Ao kin songjen atema bilemtsüla, ta Nagaland RD & SIRD Minister, Metsübo Jamir-i metetdaksü. Pai iba o ya April 29, 2023 nü Kohima Aor Telungjem (KAT) yimkong mungdang nung tongti tejaoker o jembidang metetdaksü.

Kohima, Dimapur, Mokokchung, Wokha, Tuensang aser yimti balala nung Aor telungjem tenteta lir, item telungjem-i pei yimti nung aliba Aor kisüng atema dang masü saka asen tasoli mongen aser Aor rangben atema bilemtsüla, ta pai ashi.

Aor lanur tazüng temeteter aika lir, parnok taküm liyonga aotsü atema asenok ajak arok khuret lir, ta paisa tatishitsü kar bener arua tebilemtem lemsatop.

Article 371 (A) ya Naga nung kümzükba aser wazüka ayutsü atema agütsüba Arla ka lir,

aji saka, tanü nisung aikati iba Arla ya pei mulungka nung rateta amshir. Tanü terenlok mapa ka inyakdi asünung ali kiburtemi ali magütsür, terenlokbo aginür aser jembir saka alibo magütsüba aika ataloka arur, ta paisa tebilemtsü kar lemsatop.

NLTP Act indang tebilemtsü ya ulura, iba ya ajanga alima rongsenkettsüng kanga ludaktsür, ya tajung majung ta mashir saka yangi tebilemdangtsü lir amai bilemer, anungji, iba ya kanga junga shisadangkaktsünür, ta paisa shisem.

Teinyaktetba kecha mali sür joko yakta asenoki Tsüngrem dang temoatsü meshia Moatsü benjong amungtsüba lir. Chirnur dang inyaka mesayura parnoki kecha mangazüktsü, anungji, chirnur dang kaket shisashiba kisüng masü saka mapa meranga inyaktsü sayutsüla, ta paisa tayongzükba ka agütsü.

Tanü asen mongjen aser tasoli Mokokchung nung tebilemtsü

aika lir, anungji, Aor mongjen ya ajaki meimdi, Kaket shisashiba bushiba nung süshia, Kohima aser Dimapur nung shiranga taneptsü bushia arurtem süshia mesüra nungdakbapur asoshi bangzüng tajung kar yanglua shilem agitsü asoshi paisa ajungshia liasü.

Delimitation ya arulanglang, aser iba mapa ya Aor legislator 10-i dang inyaktsüba masü, ibai arok khuret lir. Iba dak sentakba nung tongtibang aser timtem indangji kanga junga aser aroka bilemdangtsüla, ta paisa tebilemba ka lemsatop.

Tanü iba sentong nung Kohima Watsü Telen Mendenbula, Nükshirenla-i tayongzükba o aser C.T Jamir, Senior Advocate Gauhati High Court, Kohima Bench-i tajungshi o tulu bener arua tesentepertem ayongzük. KABA Choir-i temeja ken ka aser Jangpetkong Senso Telungjem, Kohima-i sobaliba ken ka ajanga tesentepertem saksalemdaktsü.



Yingli College, Longleng nung English, Economics, Sociology, History aser Education nung Honours sayutsü atema Permanent Affiliation agütsü alang malang reprangdangtsü atema Nagaland University nungi Prof.Das, English Deptt; Prof.M.K.Sinha, Economics deptt aser Prof. Athongo, Sociology deptt nungertem April 28, 2023 anogo nung arua semdangogo. Iba mapang parnoki college tesayurtem aser kaketshirtem ajurua sensaksema liasü. Iba college nung Political Science nung Honours-bo 2009 nungi Permanent Affiliatiion ngua agidadagi. NU nungi tesayurtem arua Yingli College semdangba mapang tesayurtem den agiba noksa ka yangi angur.

## Road Safety award indang osang metetdaksü

**Dimapur, Rongchii/April 29 (TYO):** Ministry of Road Transport & Highways-i, "Scheme of Financial Assistance for administering Road Safety Advocacy and Awards for the outstanding work done in the field of Road Safety" dak sendakba nung 2021 küm September 21 nü Scheme Guidelines sangdongogo, koba 31.03.2026 tashi inyaksangshitsü. Scheme indang guideline ya Ministry indang website nung angutsü, ta ketdangsurtemi metetdaksü.

Iba scheme benokba nukjidongji, result tajung angutsüba dak rangloker road

safety dak sendakba nung tangazükba balala agütsütsü aser yimya yimpong melenshiba ajanga lenmang nung lendong atalokba tajemba kümdaktsütsü asoshi lokti tentet balala nem shilem agidakja maongka agütsütsü atema lir. Iba scheme ya National Road Safety Policy den sendaktepa inyaksangshitsü.

Temsüa alirtem rongnung Companies Act, 1956/2013 kübok Societies Registration Act/Firm registered kübok Indian Trusts Act/Cooperative Society kübok aliba NGO/Trustaser UGC Act kübok University mesüra University ama agizüka aliba accredited/

affiliated Academic Institution tem densema lir.

Ministry-i, road safety dak sendakba nung teyari agütsüba temsüa aliba lokti tentettem "Grant of Awards to the Agencies involved in Road advocacy and allied activities" atema jaokogo. Application ya Ministry indang online portal <https://morth.nic.in> ajanga agizütsü. Iba portal ya 2023 küm May 1 nü nungi 2023 küm May 3 nü tashi lapoka alitsü.

Sentong nung shilem agitsü jangra aliba aser temsüa aliba lokti tentettem dang apply asütsü asoshi ajungshir, ta kasa sangdong ajanga metetdaksü.

## NDPP Mkg Region-i parnok lenir nem tetushi agütsü



Advisor asem – T.N Manen, Temjenmenba aser Imkongmar aser Mokokchung region president tejenba N. Bendang Jamir aser region president tasenba Mangyangnungba noksa nung angur.

**Mokokchung, 29th April (TYO):** Nationalist Democratic Progressive Party (NDPP)Mokokchung Region-i ayongzüka Mokokchung district nungi NDPP ticket nung adoker legislator par trok - Sharingain Longkumer (Speaker, NLA), Metsübo (Minister RD & SIRD), Tongpang Ozüküm (Advisor, Water Resources), T.N Manen (Advisor, Law & Justice, Land Revenue), Temjenmenba (Advisor, Transport & Technical Education), Imkongmar

(Advisor, Minority Affairs & Sericulture) aser DAN Chairman – Dr. Watizülü Süzümeren Jamir parnok nem tenüngsang agütsüba den repsema NDPP Mokokchung Region President melentepba sentong ka parnok kimen – Pangerzülur kidang meraketa agiogo.

Ajungbena sorkar maparen kar adokba ajanga Nagaland Legislative Assembly, Speaker – Sharingain Longkumer, Minister – Metsübo Jamir, Advisor – Tongpang Ozüküm, DAN

Chairman – Dr. Watizülü Jamir parnok iba sentong nung medentet. Aji süaka, renema akaba sentong ajak tobur junga agiogo.

Sentong nung Advisor, T.N Manen-i jembidang, party tenzükerteri kanga meranga inyaker Mokokchung district nung NDPP ticket nungi candidate 7 toktepba rongnung 6 tashi adokdaksütetba asoshi tenüngsang agütsür aser iba yagi Mokokchung district telungjem tulu sayutetogo, ta metetdaksü.

Talemeri kechi portfolio lemzütsüogo, iba nungji temulung sür tajungtiba agi Mokokchung district aser Nagaland songjen renlokba nung shilem agitsü asoshi inyaksü. 'Onok ya Chuba ka masü, nübur meyonger ka dang lir, anungji, onokia nübur ola anga-a inyaksü merangtsü aser nüburtemia pei temeten den teinyaksü metettsüla', ta pai ashi.

Alima rongsenkettsüng terenlokji dang terenlok masü saka loktiliba terenlokja sakuku tongtibang lir, pei atema dang masü, yimer atema dang masü saka alima atema bilema inyaksü asoshi paisa tayongzüka ka agütsü. 2026 nungji delimitation inyakyimji arulanglang, anungji, ajaki iba atemajia bilema aser renema

## Ao Senden-i Maotsü benjung salem lemsatep

**Dimapur, Rongchii/April 29 (TYO):** Aoer akhi tsürabur mapang nungi munga aruba Moatsü benjongmung taküma tensa mapang tajung lia Tsüngremi asen dangi bentsür arunung Ao Senso ajak dangi Moatsü tepela benjongmung salem Ao Senden mendenti nungi abener. Iba benjongmung ajanga Ao senso ajak Tsüngremer temoatsü lidakjangni ta sarasadema moatsür, ta Ao Senden tir

Chubawati Longchar aser Gen. Secretary Imtipokyim nati külem sangdong ka ajanga metetdaksü.

Ajioda asen akümket benjong Moatsümung Monupii 1-2, 2023 anogo Imkongmeren Sports Complex Mokokchung nung akatsü sentong tulu renema alinung yangji nübur ajak longsoa arua adentsü asoshi pelashishia jaoker, ta kasa sangdong ajangsa metetdaksü.

## Faith Theological College graduation sentong agiogo

**Dimapur, Rongchii/April 29 (TYO):** 14buba Faith Theological College graduation sentong April 29 nü FTC campus, Ura Villa colony nung agiogo.

Iba sentong nung tongti o jembir ji Vice Chairman, Joint Christian Forum Dimapur, Rev. Vitoshe Swu liasü. Sentong nung Minister Forest, Environment & Climate Change, Village Guards C.L John alakteta jaoker asütsü jaok ajisüaka pa mazüngba ajanga pa melena OSD to the Minister Forest, Environment & Climate Change, Village Guards, Niholu Ayemi-i sentong nung shilem agia liasü.

Tongti o jembir ama o jembiba mapang Rev. Vitoshe Swu-i Luke 5:1-5 dak ajemdaker graduate asüba kaketshirtem ayongzüka liasü. Laihsiba nung Peter-i koda Yisu-i ashiba anga zütsü ona anga aika apu, iba tatishitsü bener arua kaketshirtem ajungshiba mapang pai Tsüngrem tenzüka wadang nung Peter-i tashi anga zütsük aonba ama tashi mangara kecha majangzüktetsü ta ashi.

Paisa, Peter ama pei anisungzüka aliba tesem toktsür Tsüngrem dang shisatsü meshia pa tenzütsü ajungshi. Rev. Swu-i alima inyakyim nung masü saka sarasadem nung mapang intoka Tsüngrem den tesendaktep

akangshitsü ajungshi.

Kasa mapang nung alakteta jaoker Niholu Ayemi-i, graduate asübaji tetenzüker dang aser iba sülenang wadang tuluba anung alir ta ashi. Paisa, nisung aika rongnungi Tsüngremi pa tenzütsü asoshi nenok shimogo, anungji iba ya mamatoki osang tajung proka samar aliba nüburtem anidentsü ajungshia liasü.

Nisung kar jenjang tajung nung anisungzüka inyaksü aser karbo kanga tokrong tia ajanga inyaksü, ajisüaka kecha nunga temulung tatem kechiyong Tsüngremi nenok len anitsü, ta pai ashi. Maneni pai college nüngdakba ajak nung takok tashi teyari agütsütsü nangzüka den kaketshir anitetba nung college-i maneni shilem tajung agitsü ajungshia liasü.

Iba sentong ya Lect. Hose Sangtam lenisüba nung agi aser Founder Principal Rev. Dr. S. Gange-i lokti pela agizükba o jembiba den pai graduate asürtem nem degree agütsü. Sentong nungsa Er. Dr. L. Yezhekhu Sumi-i tepela o jembia liasü.

Taküm Faith Theological College nungi External aser regular kaketshir ajak senteper parnok 24 graduate süogo. Kaketshirtem nem B.th, M.div aser Mth degree tem agüja liasü.

atatsü asoshi paisa iba dak sentakba nung inyadaksünüba o kar shisem.

Advisor, Temjenmenbai mapang tatsüka agidang, election mapa temer Aor legislator-tem amendang Mokokchung district nung tzu tebilemtsü, lenmang tebilemtsü, mozüki jenjang tajungba ajungkettsü asoshi, saisapong luyim tsütsü aser nungdakba maparen kar inyaksü asoshi jembitepa liasü ta ashi. Kati ka aitsütepa tamajung dang mejembi-i tajung kechi lir, iba dakji rangloker külemi lungjemmer maparen ajak inyaksü asoshi paisa party pur ayongzüka liasü.

Advisor, Imkongmaria mapang tatsüka agidang, maongka tulu agüja pa nem NDPP ticket agütsüba den party pur teyaritap ajanga takok ngudaktsüba asoshi pelaba olen ka ashi. District shia nung party tashi itta alinung dang central office aser state nungji tashi aittsü, anungji, party tashi itta aotsü atema akokba tashi shilem agitsü, ta paisa shisem.

Iba sentong nung NDPP Mokokchung Region President anensang, N. Bendang Jamir aser President tasen shimsang, Mangyangnungba tenatia mapang tatsütsü agia tepela o den tayongzüka otem

lemsatep. Mokokchung yimer N. Bendang Jamir ya 2017 nungi NDPP Mokokchung Region nung President inyaka aru aser 2021 nung tanaben pasa president shimshi. Tang pa NDPP nung Working President shimba ajanga iba melenmetatsüsa aküm. NDPP Mokokchung Region president elect Ungma nunger Mangyangnungba ya NDPP central office nung General Secretary inyaka liasü.

Iba sentong nung NDPP Mokokchung Region Vice President, Lipokzülu menden liasü aser NDPP Mokokchung Region General Secretary, Repameren-i tepela o metetdaksü. Tir melentepba shilemji NDPP Mokokchung Region Kimen Pangerzülu-i agi. Women Organization Secretary, Kilenla den temoatsü meshia sarasademer sentong tenzüka liasü aser Ngati Baptist Arogo Pastor, Sentiyaner-i yimsüsürtem aser NDPP ketdangsurtem asoshi temoatsü meshia sarasademtsü.

Iba sentong nung NDPP central office den Mokokchung region office lenla balala nungi aser Mokokchung region kübok aliba Assembly Constituency 10 nungi party tenzükerter arua shilem agia aden.



April 29, 2023 nü Santo Domingo nung Indian Embassy semzükba sülen India External Affairs Minister, S. Jaishankar, Dominican Republic Foreign Minister, Roberto Alvarez aser minister tem tangokba noksa nung angur.

### 'Mann Ki Baat' 100buba UN headquarters nungi live sayutsü

**New York, April 29 (Agencies):** Ato kilonser, Narendra Modi-i ita shia radio sentong ajanga jembiba 'Mann Ki Baat' 100buba United Nations headquarters nungi live sayutsü.

Honibarnü Permanent Mission of India to United Nations-i twitter ajanga, "Ato kilonser Modi indang 'Mann Ki Baat' 100buba April 30 nü UN HQs nung Trusteeship Council Chamber nungi live sayutsü," ta metetdaksü.

Mann Ki Baat sentongji April 30 nü anüingdang India nung mapang 11:00 ako nungi live sayutsü; aser ibaji New York nungbo Amongnü anepdang 1:30 ako nung asütsü. UN

Headquarters nung anepdang züngia iba sentong live sayubaji puti otsü tasen ka asütsü.

"#MannKiBaat ya linük nung ita shia agiba sentong ka kumogo, aser iba sentong ajanga India nung terenlok nung shilem agitsü atema nisung million aika ajungmesor," ta Permanent Mission-i metetdaksü.

New York nung Consulate General of India den Community organisations-ia Indian-American aser New Jersey nung aliba sensotem atema 100buba 'Mann Ki Baat' sentong sayutsü.

'Mann Ki Baat' radio sentong nung Ato kilonser Modi-i linük nürurtem nem tongtibang onük balala nung

osang metetdaksüir. Iba sentong ya mezüing 2014 kum October 3 nü tenzük aser ita shia tatembangbuba Amongnü anogotem nung anüingdang 11:00 ako nungi sayur.

100buba Mann Ki Baat sentong ya minute 30 agitsü.

100buba 'Mann Ki Baat' ya radio stations 1000 dak tema nung sayutsü; item rongnung nija FM stations, community radios aser TV channel balala densema lir.

Mann ki Baat 100buba nüngtem nung commemorative stamp ka aser senjang tasen ka sayutsü. Item sentong ajak takok ngua agitsü atema BJP National Tir, J P Nadda nem mapang nungloktstüogo.

### Andhra Pradesh nung Exam result sangdongba sülen nisung 9 soseta asü

**New Delhi, April 29 (Agencies):** Andhra Pradesh state nung state board-i class 11 aser class 12 pur tatidang agiba result sangdongba sülen ghonda 48 tsüingda kaketshir 9 soseta asü aser kaketshir anatia soseta asütsü meranga liasü.

Bodhbarnü Andhra Pradesh Board of Intermediate Examination-i intermediate results sangdonga liasü. Taküm March-April nung kaketshir lakh 10 dak temai iba tatidang agüja liasü.

Osang angazükba agi, item tatidang nung tamakok anguba sülen state tesem balala nung kaketshirtemi soseta asü.

Srikakulam district kübok

Tekkali nung arrshi kum 17, B Tarun-i train tarudak nung train lenmang nung pungoka asü; pai subject aika nung tamakok ngua liasü. Ano Visakhapatnam district kübok Trinadhapuram nunga arrshi kum 16 tetsür kati lar kidang lisü agi alenseta asü.

Visakhapatnam kübok Kancharapalem kiyong nung arrshi kum 18, B Jagadeesh-i subject ka nung tamakok anguba agi soseta asü aser arrshi kum 17, Anusha-a subject ka nung tamakok anguba agi soseta asü.

Chittoor district nung lai awatsüing ka nung pongoka asü. Chittoor nungi tebur kati exam nung tamakok anguba agi shiruru/mesen asütsü mozü jema

asü aser Anakapalli nung arrshi kum 17, T Kiran-i par kidang lisü agi alenseta asü. Pai subject kar nung mark ishika dang anguba agi soseta asü.

First-year intermediate examination atema pass percentage ji mark 61 liasü aser second year intermediate examination atema pass percentage ji mark 72 liasü.

Tawa IIT Bombay aser IIT Madras nunga tatidang nung tamakok angur aikati soseta süogo.

Police aser psychologist temi kaketshirtem dang, tang tamakok anguyonga taruba nungbo takok aika angutsü, anungji tejashi nung soseta masütsüla, ta ajungshir.

## Rajnath Singh-i Hombar nungi anogo asemnü Maldives semdangtsü

**New Delhi, April 29 (Agencies):** Defence Minister, Rajnath Singh-i Hombar nungi tenzüka anogo asemnü Maldives semdangtsü aser iba mapang nungji linük ana tsüingda defence aser asalentong tesendaktep tashi itshitsü atema jembitsü.

Hombarnü Chief of Air Staff Air Chief Marshal VR Chaudhari-ia Sri Lanka semdangtsü.

Region nung China-i ambangyima inyaksü merangba mapang nung India defence minister aser Chief of Air Staff nati tzüym agi meketbanga aliba kidanger linük ana semdangtsü.

Maldives nung Rajnath Singh-i Maldives Tir, Ibrahim Mohamed Solih, Foreign Minister Abdulla Shahid aser Defence Minister Mariya Didi nung ajurutsü.

"Linük ana tsüingda Defence tsütsü amalitep jenjang tajungba akümsü atema minister-i Maldives semdangtsü," ta

ketdangser kati metetdaksü. Indian Ocean Region nung India atema Maldives ya tongtibang kidanger linük ka lir; tesüiba kum ishika tsüingda linük ana tsüingda defence aser security densema lenla aika nung tesendaktep jenjang kanga junga kumogo.

Yaküm August ita nung Ato kilonser Narendra Modi aser Maldives Tir, Ibrahim Mohamed Solih nati Greater Male Connectivity Project (GMCP) tenzüka liasü.

GMCP project kübok kilometer 6.74 talang apu ka yanglutsü aser ibaji ajanga Maldives yimtiba, Male den anasa aliba asetkongtem-Villingli, Gulhifalhu aser Thilafushi sendakteptsü.

Taoba ita Defence Secretary, Giridhar Aramane-ia Maldives semdanga liasü aser iba mapang nungji pai Maldives Defence secretary, Major General Abdulla Shamaal ajurua senden amen.



April 29, 2023 nü Ranchi nung Sonali Mazumdar-i kibur maliba azütem nem chiyungtsü agütsüdang tangokba noksa nung angur. Sonali Mazumdar aser la kinüingbu, Somen Mazumdar nati azü atema shelter home ka lapoka yangji kibur maliba azütem, shirangba azü aser yirua aliba azü 120 dak tema mesür.

### Karnataka election sülen opposition lenirtem ajurutsü: Nitish Kumar

**Patna, April 29 (Agencies):** Honibarnü JD(U) lenir aser Bihar chief minister Nitish Kumar-i, Karnataka nung assembly election agiba sülen opposition lenirtem Patna nung tongtibang senden ka amentsü, ta metetdaksü.

Opposition lenirtem aika Karnataka election atema mazüing lir, anungji election tembangba sülen ang opposition lenirtem senden amentsü, ta pai metetdaksü.

JD (U) lenirisa, iba senden nungji taruba general election atema opposition telongjem dak sendakba nung onük aika jembitsü, ta metetdaksü.

"2024 Lok Sabha elections nung BJP den tokteptsü atema opposition party tem teloktep asoshi onoki mener o lemteptsü. Tang lenirtem kar assembly election (Karnataka) atema kanga mazüing lir. Anungji election tembangba sülen sendenji kong ayongzüka akatsüar onoki jembitsü. Patna nung ayongzüksü atema ajaki melungtepra onoki yangi senden ayongzüksü. Pata nung süra onoki sendenji pelaseta

ayongzüksü," ta pai metetdaksü. April 24 nü Kolkata nung West Bengal Chief Minister Mamata Banerjee-i Nitish Kumar aser Bihar deputy chief minister, Tejashwi Yadav na ajurua senden amendang lai tena dang BJP nung madenba party tem senden ka Patna nung ayongzüksü mepishia liasü.

Kumar den senden amenba sülen osangbenertem den jembidang Mamata-i, "Ni Nitish Kumar dang langka mepishio. Jayaprakash-i Bihar nung mapatong ka tenzüka liasü. Bihar nung party ajak senden ka ayongzüka katetra onoki iba sülen sendenji tanga tesem ka nung ayongzüksü," ta metetdakja liasü.

Kasa osangbenertem senden nungji Kumar-i, "Onoki BJP-i aniba Centre sorkar anema linük nung akokba tashi party teimba ayongdentsü merangtsü. Tawa ni opposition lenirtem aika ajuruogo. Ni BJP nung madenba tanga party tem den-a jembitsü. General election matongdang opposition party tem longjemdaksütsüji kü nükjidong lir," ta metetdakja liasü.



April 29, 2023 nü Jantar Mantar, New Delhi nung Congress lenir, Priyanka Gandhi-i longkak aiter wrestler tem- Bajrang Punia, Vinesh Phogat, Sakshi Malik aser Sangita Phogat nung ajuruba sülen lai osangbenertem den jembidang tangokba noksa nung angur.



## TIR YIMYIM YIMOBILEM (EDITORIAL)

DIMAPUR AMUNGNÜ, RONGCHII (APRIL) 30, 2023

### Tangari kuli sütsüba

**T**aküm nung sademsadema aser pelashishia alitsüba tashiji aseni inyakba ajak nung tangari temulung lemtettsüsa inyakba nungi arur. Tetezü, asen taküm aser kibong indang ya aseni junger ta ashiba agi masü, saka asen ajung majung asadangtsüba ya tangari asen indang kuli agütsüba ajanga dang asadangtetsü. Tanü asüng balaka anogo shia yimten aser lokti lenirtemi peisasa pei ajungba indang jembiba kanga angashir. Alimabo tamajungba aoer saka asenokbo tajungba akümer amai asenoki asenok tenüng sanga kanga jembir. Ajsüaka aseni asen asangba kuli jagi masü saka Tsüngremi aser tangari asen tenüng asangba kuli agiang asenok metentsü. Israel nunger yimten otsü nung Samuel putir ya tesüsaba yimsüsür aser obendanger putir liasü. Pai pa taküm tepiyong Eli putir melena Israel madak yimsüsüa arudang, maparen ajak nung indangindanga nübortem madak yimsü süa aru. Pa jakdang inyaker putirtemibo ochimashi mapa inyakbatem kanga liasü, anungji Samuel-ia parnok amaji ochimashi mapatem inyaktsüa koka liasü. Ajsüaka, pa arishi tatembangleni arudang, pai tai shitak inyakba indang pasasa mejembi saka nübortem nem dang shidaktsü. Akhi mapang yimten nung 'democracy-ji aji ka liasü. 1 Samuel 12 nung asenoki Samuel putiri Israel nunger ajak sentepdaksür, pai parnok dang nungi tim masüba mapatem ajanga langka agia lira, aser tim masüba nung parnok kangshia lira, mapa kar nung kar ashiochtsüa lira aser kenü danga sübokrem kar nungi danga agia lira, ni nenok nem shia agütsüdi ta ashiba asenoki angur. Idsangji, Israel nungertemi, " nai onok mashioktsüka mesüra mekangshika aser nisung shinga ket nungia sübokrem magika," ta langzüba angur. Yimsüsür ka nem nübortemi yamaji ochishiba kuli agütsüba koda tenükshitsüka aser jangratemtsüka ta iba otsü azüngdang ajungshir. Ano, nübortemi pei yimsüsür nem kuli tajung agütsüba dang nungibo ano, yimsüsüri nübortem dang ni nenok meyong langka danga agia lira, itemji ni meyiptsüdi ta yimjak nung temulung ajak sadaka yutsüabajisa topur tajungba liasü. Iba otsü azüngdang, asen lima nunga asenok lenirtemi nübortem dang yamajika kuli meshitetsü asü memeshitetsü ta rataa bilemer. Asenok tsüraburtemia pei apuani aser tanurtem dang, ni nenok anema langka danga inyaka lira, shiang, nie nenok dang taidok nangzükti ta shitetter asü. Samuel ama tangari asenok tai aputsü tsüba mebilemi asenok mali tashi, asenoki asenoksasa junger ta bilemetsüa akok aser jembitsüa akok saka, ashiko, asen takümü Tsüngrem aser nisung tsüngdangbo junger ta magizüktetsüa akok. Atangji, asenok nisung dang asünungji Samuel amajibo meshimeshia melitetsüa akok saka asenoki inyakba taibo Tsüngrem aser nisung tsüngdangbo nangzüktetsü. Asenok aiben Tsüngrem nungi pilatsüsa akümba aser tangari asenok dak temulung melemtettsüsa alibaji, asenoki tai inyakba agi masü saka asenoki inyakba taitem asenoksasa asenoki menanzüktetba ajanga lir. Tai menaang temena, asenoki taoba mapangtem nung inyakba mapatem tanü meinmyak mekümtetsü saka asenoki inyakba taitem Tsüngrem aser nisungtem tsüngdang nangzüktetra, tanü nungibo ano taküm tasen kümshir, Tsüngrem aser nisungtemi asen dak temulung lemtettsüsa asenok lia otettsü. Taküm jangratema alitsüba ali rongsen aika akaba agi masü saka tangari asenok dak temulung lemtettsüsa asenok indangindanga aliba ajanga arutsü. Tangar meyong langka razüka agir mesüra tangar kar dang nungi sübokrem agir mesüra tangar anema mapa tamajung ka inyaker asen mulung agi asen aija alibaji asenoksasa asen tepuokdak puoka ayur ama lir. Ibaji nüchiso akaba taküm masü saka ochimashiba lar asütsü. Asenokbo joko asenbo tajung saka tangarbo majung ta bilemba shisatsü endokdi. Aseni asen junger ta asüba agi meperir aser iba nungji lendong keta lir, anungji asenokbo Tsüngremia aser nisungia aseni inyakba mapa nung ya koma kuli aka agütsütsü ta shisadanga indangindanga alitsü merangdi.

## OLEMSABANG

### TER SHILEM INDANG LAI TESAYUBA

~ Rev.P.L.Wati Longchar  
Rtd. Child Missionary, Yimyu Ward, Mokokchung.

Ter shilem ya aikati timi agütsüba ngua pelar saka lai puti ajanga kechi ashir ta asüba shitakba Lai tesayuba indang ya küm 150 tamangertemibo angatetsüogo. Ter shilem item sentongtem nung amshiba aser agütsüba ya nibo tim masü amai bilemer :

1. Tasoli kija arogotemi pei arogo jubilee mesüra Revival atema senso ajak nungi ter shilem kangkokangjia saruba.
2. Ano, bendanglen alirtemi ter shilem agi pei tasoli arogo Revival mesüra Retreat ama agiba sentongtem asoshi agütsüba.
3. Kibongtemi ter shilem Mission atema amshiba mesüra Theology aser Bible azünger yariba nung amshiba.
4. Ter shilem agi Christmas donation akümba.
5. ABAM budget membership apir arogo shiai 5% katizüka agütsür, anungji na züngsem aliba arogo nung nai ter shilem magütsüaka arogoibo ABAM nem agütsüogo ta angatetsüla.
6. Kibong kati ter shilem magütsüi lia arur, kibong nung sentsü tulu tsüloka shiranger taneptsü bushia bendanglen anir senzür majung asüba ngua aruogo.
7. Asen alidak ter shilem yabo ochishia agütsütsüla saka karibo tangaleni yoker. Ibaji asen tanur Science subject nung tuition agi saka tuition fee-bo Maths tesayur nem agütsü amai lir. Arogo nem asenoki tenla agütsüba sen jagi arogo nung asen chirnur aser semchirsemnurtem Child nungi tenzüker Youth tashi anepalur ta asenoki metetdi.
8. Asen manemi alidang arogoi semdang aser asen asü nüa asen züngsem aliba arogoiang asüpila agitsür anepalua rema toktsütsü. Ashiko, aseni ter shilem yokaka, asen timtem aser asü ama mapang nung yimtak nungi yimerbo marutetsüa akok.
9. Ter Shilem o Donation na balala ta angateta Tsüngrem dang tenlatsüla.
10. Local arogotemi benanglen alirtem dang ter shilem makangtsüla saka temulunger tenlabo pei mulung.
11. Kü tamang tangatetba : T.Ken 116:12 "Kiibubai kü dang jungsa ajungba ajak asoshi nia kechi agütsütsü," ta asüba tenla ya ter shilem südaktsüdi.  
Ozü kibong küm 53 ita sen agia alidang Rs.30/- nungi tenzüker aser Rs.3200/- agia retire asü. Ozüi ochishia ter shilem agüba aruba ajak agi sen Rs.4000/- dang liasü. Ter shilem yabo kotaker bank nung ayur amai lir. Tangbo tetemlok lia molamoshia agidagi. Ozü yimer arogoi ita shia Ordain asüba pension sen Rs.4000/- agütsür. " Agüjang nenok nem ni lepa agütsüdi," ta asüba ya angatetlasang, koda jungla !
12. Tanela sempet akar kari ter shilem ya Prayer Home nem agüjang ta ashi aser asaa taor aser matamabensar yariang ta shia liasü. Nibo ajibo Lai nung mezüngshi.  
Amangba purtem ajaki ter shilem yabo Tsüngrem tsüda, aji serang tepela, tenüngsang aser temulunger tenla angateta Tsüngrem nem bentetbenteta agütsütsü mapang tongja tongogo. Tsüngremi tazünger ajak moajangma, Amen.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Japu Baptist Arogo nung Lokti Yanglushi sentong agi



**Mokokchung, Rongchii/ April 29 (TYO):** ABAM Social Concern ajanga ayonga maneni ABAM nung Zone 5, 6 & 7 Arogotem nung toklanga tenzükertem asoshi "Lokti Yanglushi" sentong April 28, 2023 nü Japu Baptist Arogo nung agiogo, ta ABAM Executive Secretary Rev. Dr.Mar Pongener-i sangdong ka ajanga metetdaksü.

Sentong nung Sannükertemi anir toklanga

tenzükertem Arogo 27 nungi 77 arua aden. Tanü asen tamangertem aika temesepba chiyungtsü achi ajemba ajanga kija, kibong aser lokti ajak nung timtem adokakja tipmedemdaksür. Yamai dang lira tarutsü mapang lanurtem tia tamajungba nung alitsü ta meteta, temesepba chiyungtsü nokdangyim sayua liasü.

Iba den ano tüzüing ozüing memetetba ajanga ochi nisung

aika koda masüba tia nung lir. Item temenen nungi kümzüka alitsü asoshi tüzüing ozüing metetyim session-a agia liasü.

Iba sentong nung shisalen sayurtem Mr. Limasangwa ABAM aser Mr. Taka Masa Ao na liasü.

Iba sentong nung adenertem ajak Japu Baptist Arogoi yimpoksüa agütsüba asoshi ABAM-i pelaba lemsateper aser Tsüngrem dang temoatsü meshia sarasadem ayur.

# Kenya linük nung lumia sarasadem dang asür 100 jungogo



April 27, 2023 nü Kenya nung televangelist aser pastor, Ezekiel Odero apuba sülen tangokba noksa nung angur.

**April 29, 2023:** Kenya linük nung lumia sarasadem dang asürtem 100 jungogo aser Brihostibarnüa televangelist ka puogo, ta interior minister-i metetdaksü.

Pastor, Ezekiel Odero apuba osang prokba mapang nung asürtem 103 jungogo. Item tatalokba sülen nisung aikati yimsü alia amangba teloktem anema mita aotsü akhanger.

Pastor, Odero apuba sülen police station-i anir aoba mapang nung osangbenertemi pa dang tasüngdangba balala asüngdang, ajisüaka pai kecha melangzü. Pa süoshi temesüing

sema liasü aser pa ket nung kaket tanak ka liasü.

Mavueni jila nung Pastor Odero indang New Life Prayer Centre aser Tenla kidang nisung aika aliba ketdangsertemi kümzüokogo, ta minister Kithure Kindiki-i twitter ajanga metetdaksü.

"Odero-i pa sülen anidakertem aika tepsetba atema pa anema ken o benoktsü," ta interior minister-isa metetdaksü.

"Odero indang Prayer Centre nung nisung aika asüba osang morgues aser institution balalai metetdaksüba sülen pa apu," ta regional official Rhoda

Onyancha-i metetdaksü.

Mavueni jila ya Shakahola arem nungi kilometer 66 shi pilar lir. Iba arem nung yimsü alia amanger, Paul Mackenzie-ia pa sülen anidakertem dang, lumiseta asüba ajanga nenok tama kodaki aotsü, ta ashi. Paul-isa April 15 nü alima tembangtsü, ta shinzüka liasü.

Paul Mackenzie-a April 14 nü apuba sülen tang tashi police ket nung lir.

Hokolbar nungi tenzüka bushisüngdangertemi pa indang Good News International Church nungi züingsem 95 tasü mang arem nung ali nungi tuteta liasü; iba dak alia nisung ti bo taküm lia angu, saka parnok ajak kanga kongrar liasü aser tesülen süadok.

Ano külen tanga osang ka nung, Kenyan Red Cross-i linük nung nisung 300 dak tema samar mangur, ta metetdaksüogo.

Osangbenertemi Paul Mackenzie indang lawyers ana den jembitsü merang saka tenapronglai telangzüba kecha magütsü.

Shakahola arem nung nisung aika asüba menokdangtetba atema Kenya nung yimsüsürtemi security services aitsür.



SangtamillaAo Baptist Arogo nung 'Father School' sentong ka April 24 nungi 29, 2023 tashiKohima Ao Baptist Arogoi nübo, shisatsü aser rongsen tenla tulu agüja katsübaatema KABA dang kanga pelar ta Sangtamilla Ao Baptist Arogo nung sannükerNüngshimereni metetdaksüogo. Iba sentong nung tebutem ajak agi 27 kangatemoatsü ngua denogo. Talisa KABA nungi Father School nung tesayur Rev.TiatoshiLongkumer, Mr.Tali Deacon, Tesayur Tianüngsang aser Tesayur Moajiba nungertemdang pelar ta paisa metetdaksü. Iba Father Scho sentong nung adenertem noksanung angur.

# ANO GO ABEN TSÜNGREM DEN

## TENLA AJANGA TUSHIBA

"Teningsang agi pa singkimi iang, aser pa talidaki sanga iang. Pa nem teningsang agüjang, aser pa nüng moajang". T.Ken 100:4

Tejen Lai mapang Tsüngrem külemtsü asoshi tenla sabangi shiruru bener aru. Tanü Kibuba nem tasü tenla melen taküm aliba tenla agütsür. Laishiba nung Tsüngrem tushiba I tenla balala indang jembir.

Tetushi tenla (Ibri 13:15). Kodang asen tebangmechi-i Pai inyakba indang aser Paji shiba indang jembidir, aseni tushiba Jjagi Pa peladaksür. Asenok temulungjang teraksa tenlar (T.Ken 51:17). Asenoki asen temang taküm aliba tenla ama agütsür (Rom 12:17&2). Mapa tajung tenla agütsüba (Matt. 5:16; Ibri 13:16). Aser sen tenla agütsüba (Fil. 4:18). Kodang asenoki tangar den sen, mapang, takaba aser tashi |lemsatepdir asenoki Tsüngrem dangi tenla bener arur.

Nai Pa sentsüwangshi asoshi tenlar asü masü shisadangang. Inyaktsü asoshi mapa aikati atadaki, aser naji temeja mapa ka asoshi shimtetba asütsü akok. Tsüngremi ne nem inyaktsü agütsüba mapa aser sempet jagi nai pa tushiba den sentsüwangshidaksüdar ama?

### SARASADEM:

Yisu na asoshi ni ki tenla ajanga na tushitettsü yariangma. Amen.

# Pope Francis-i refugees semdang; nüngdakbapurtem yaritsü ayongzük

**Budapest (Hungary), April 29 (Agencies):** Honibarnü Pope Francis-i Hungary nungertemi Ukriane nunger refugees agizükba atema parnok dang pelaba lemsatep aser teyari nüngdakbapur ajak yaritsü ayongzük.

Pope-i anogo asemnü Hungary semdang, aser tanünübuba nung pai refugees aser St. Elizabeth Arogo nung sensakertem ajurua liasü.

Refugees rongnung karbo Ukraine nungi jena arurtem liasü.

Francis-i Hungary nung Russian Orthodox Church lenir Metropolitan Hilarion ajuruba sülen Vatican-i sangdong ka ajanga, Budapest nung minute 20 shi senden amen, ta metetdaksü.

Russian Arogoi Ukraine nung raraba pusemba ajanga Pope Francis-i Russian Orthodox Church nung tongti, Patriarch Kirill majurur.

Budapest nung aliba St. Elizabeth Arogo nung jembidang Pope Francis-i, osangtajung kaketterem ajanga Khristantem dang ajak dang temeim sayutsü tuyur, talisa sensak tia nung alirtem aser timtemertem aser mamangertem danga temeim sayutsü tuyur, ta ashi.

"Yisui asenok dang temeim sayu aser asenok dang loktiliba nung temenen balala atsüdoxtsü

atema inyaktsü tuyur," ta pai metetdaksü.

Pope Francis-i Hungary nung Catholic Arogoi rara ajanga jena arurtem nem teyari agütsüba atema pelaba lemsatep aser maneni nüngdakbapurtem yaritsü ayongzük.

Amongnü Pope Francis-i moapu nung tekülem sentong ayongzüka agitsü aser Pázmány Péter Catholic University nunga jembitsü.

Hungary nung nationalist sorkari anti-immigration mapatongtem benokogo aser arrtsü adena linük telungi aita jenoktsü merangertem magizüker, aser ibaji ajanga mapang talangka European Union den mangatettep adoka lir.

Hungary Ato kilonser, Viktor Orban-i, bendangertem arua jenokba ajanga Europe nunger Khristan sobaliba amokmerener, ta jembio.

Election atema nüboyimba mapang nung pai, bendangertem aser refugees ajanga Hungary nunger lenla balala nung amokmerentsü, ta jembia liasü.

Orban-i aniba sorkari Middle East aser Africa nungi bendangertem mejenokdaksür saka Ukraina nung rara ajanga linük toktsür ajenertembo aika Hungary nung jenokdaksüogo.

Tang Hungary nung refugee 35,000 shi lir (UN).

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Puiner**

(n) tanabenbuba semchir (great grand children)

\* **Puiner** ngua alir tsüraburtem aikabo mali.

**Puinren**

(n) shisa tasen bushiloka inyakba yayim (scientific)

\* Asenoki inyakba mapatem ajak **puinren** agi inyaktsüla.

**OLONG PAITEP # 6500**

1				2				3		4
5		6								
							7			
8										
										9
		10					11			
				12				13		
14										
							15			
16										

**TIPLIN**

- 2. Auo nung chiyongsü asenba
- 5. Mangyimba mapang
- 7. O tamendakdak
- 8. Pei dak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

**LANGTSÜNGLEN**

- 1. Lenmang
- 2. Aor kidong ka tenüng
- 3. Tenarong maten
- 4. A \_ \_ \_ g
- 6. Mopung apodoka
- 9. Tongtipang tagitsü
- 10. Menungra bilem
- 11. Aiür
- 13. S \_ \_ \_ k
- 14. T \_ \_ \_ r

**OLONG PAITEP # 6499 TELANGZÜBA**

**TIPLIN :**

- 2. Atang, 4. Tenya, 7. Oba,
- 9. Anogo, 10. Ayong, 11. Jilia,
- 13. Ako, 14. Kimen, 15. Lenrü.

**LANGTSÜNGLEN :**

- 1. Lendi, 3. Tebung, 5. Yongya,
- 6. Bangjem, 8. Atongpu,
- 9. Anüshi, 10. Ainkar, 12. Tejen.

**TETSÜ, TEBU ASER TECHIR OTSÜ :**

**Techir** : Oja, yashi Obala den bus nung arudang tu nisung onsaraba agi kü mendenji aiür tobour tajung ka nem agüjang ta obalai ashiji agütsüatu.

**Tetsü** : Good, talak nai kanga junga inyakoko.

**Techir** : Saka oja, niji Obala tepi manung mener arurba asüasungtu.

**Tetsü** : Mekümteta.

Lilir : WhatsApp

**Tepela Tasoba Anogo**

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüng : .....  
2. Tasoba anogo: .....  
3. Küm : ..... 4. Class : .....  
5. School : .....  
6. Talidak : .....  
7. Salem osang : .....

**Tripura BJP-i tesem 1500 tema nung 'Mann Ki Baat' angadaksütsü**



**Agartala, April 29, 2023**

(Agencies): Tripura nung BJP-i April 30 nü Prime Minister Narendra Modi indang 'Mann Ki Baat' angadaksütsü atema sentong tulu ka renemogo.

Tripura BJP-i state kübok tesem 1500 tema nung nübortem nem 'Mann Ki Baat' angadaksütsü.

"Ita shia tatembangba Deobar nung , Prime Minister Narendra Modi-i Mann Ki Baat ajanga linük den jembir aser onük aika lemsateper" ta BJP state president Rajib Bhattacharya-i tanü ashi.

"April 30 nü Prime Minister Modi-i Mann ki Baat indang 100th episode jembitsü. Iba atema onoki Tripura nung tesem

1515 renemogo aser nübortemi PM-i jembiba angatsü akok" ta pai ashi.

"Tesem 1515 nung Zila Parishad, Gram Panchayats, Nagar Panchayat aser Village Council dena lir. Iba dak alia BJP indang booths 3328 nunga nübortemi PM-i ashiba angatsü akok" ta Rajib Bhattacharya-i ashi.

BJP-i tourist tesem ajak nung 'Mann Ki Baat' angadaksütsü renemogo, ta paisa shisem.

State sorkaria Mann Ki Baat indang 100th episode atema sentong balala atonga lir.

Tripura nung Governor House nung sentong tongtiba agitsü aser idakji state lennirtem, Chief minister aser sorkar ketdangsürtem adentsü" ta ta

pai metetdaksü.

PM Modi-i Mann ki Baat sentong agia arudang Tripura nungi nisung pungu den sensaksemogo aser Governor house nung agiba sentong nung nisung pungu ya adentsü, ta Bhattacharya-isa metetdaksü.

Prime Minister Narendra Modi indang 'Mann Ki Baat' 100th episode atema Ministry of Information and Broadcasting-i Raj Bhavan ajak nung live screening asütsü sentong lir.

Tripura Governor Satyadeo Narain Arya-i iba sentong nung tongti tesemdang ka ama shilem agitsü aser Tripura Chief Minister Prof. (Dr.) Manik Saha-i tetushi tejaoker ka ama adentsü.

**Opposition lennirtemi Rahul Gandhi dak temulung alemer: Mizoram Congress**

**Aizawl, April 29, 2023**

(Agencies): Centre nung Congress-i aniba sorkar ka akümtsü kechiyong opposition party temi Rahul Gandhi dang temulung alemer ta Mizoram Congress unit president Lalsawta-i ashi.

Sangküm Lok Sabha elections sülen Congress-i aniba teloktep sorkar ka akümtsü atema opposition party tongtitemi merangdar, ta pai ashi.

"Opposition party aikati

Rahul Gandhi dak tamang akar. Congress-i aniba teloktep sorkar ka Centre nung akümtsü kechiyong tongtipang opposition party temi iba atema inyakdar" ta Lalsawta-isa ashi.

Kolasib district kübok Assam den arrtsü aliba Vairengte jila nung Congress conference ka nung pai iba osang metetdaksü.

Congress-i Karnataka aser Madhya Pradesh assembly election nung takok angutsü ta

paisa shisem.

Züngsem 224 agi akümba Karnataka assembly election May 10 nung agitsü aser taküm kümsa Madhya Pradesh assembly election agitsü sentong lir.

Aluyimertem aser meranga inyakertem azükarutsü atema Congress-i state sorkar akümtsü meranger ta Lalsawta-i ashi.

Züngsem 40 agi akümba Mizoram assembly election taküm agitsü.

**Assam Police-i Gossaigaon nung KLO (KN) telungpur 2 apu**



**Guwahati, April 29, 2023**

(Agencies): Assam police-i April 28 aonung Gossaigaon nung KLO (KN) züngsem ana apu. Tena ket nung IED bena liasü.

Gossaigaon police-i Hatigarh yimtsüng nung tanep 2:00 ako meta KLO (KN) züngsemtem apu ta osang ajanga ashi.

Tena ya Bipul Roy aser Uttam Rai na ta jangaago aser police-i tena ket nung IED

explosives, walkie-talkies aser sen bena aliba angu.

KLO (KN) züngsemtemi shishilembar dang nungi tashiyim agi sen meshir ta osang angashiba sülen Gossaigaon police-i tena apu.

Telungpur telok shinga nema Assam nung parnok inyaknüba mapa meinyakdaksütsü ta

Assam Director General of Police (DGP) GP Singh-i April 24, 2023 nü shia liasü.

April 24 aonung sepaitem aser Kamatapur Liberation Organisation (KLO) tsüngda khatepdang telungpur ana kaset. Iba tesem nung pistol ana, tapoktsü yangludang ashiba osettem aser camping equipment ngutetogo ta GP Singh-isa ashi.

Kokrajhar kübok Chakrashila nung KLO telungpur telok kati tesep ka amentet aser idakji khatep.

# US-S Korea tenangzüktepba nung lendong keta lir: Kim Yo Jong



2018 kübok South Korea tir Moon Jae-in den summit ka amenba sülen joint statement ka nung sign asüba mapang Kim Yo Jong-i, North Korea lenir Kim Jong Un nem teyari agütsüba noksa nung angur.

**Pyongyang, Rongchii/April 29 (Agencies):** North Korea lenir Kim Jong Un adianu Kim Yo Jong-i, South Korea aser United States nati Pyongyang-i amokmerenba telangzüba agütsütsü asoshi tenangzüktepba tasen ka yangluba atema telangzüba agüja N Korea-i ano military tashi tali sayutsü ta shiogo.

South Korea nuclear security tali ajungkettsü atema Washington aser Seoul nati iba hopta tenangzüktepba yangluba ajanga tensa tamajungba kümdaktsütsü aser North Korea anema jenjang tesashi agiba sayur, ta Kim Yo Jong-i ashiba media sangdong balala ajanga Honibarnü metetdaktsü.

Iba tenangzüktepba yangluba sülen nuclear rara nokdangtsü atema jenjang taliba agütsü nungdaker ta North Korea-i jangja jangja metetogo, ta Kim Yo Jong-i ashiba official Korean Central News Agency (KCNA)-i metetdaktsü.

"Tsükchirtem koda nuclear war exercise tali ayongzüka agidir aser koda Korean peninsula nung nuclear assets tem tali amenokdir yamaji onok self-defence asoshi parnok den liromedema onokia jenjang tesashiba agütsü," ta lai ashi.

US-South Korea tenangzüktepba ajanga Northeast Asia nung dang masü saka alima ajunga yimjung aser security nung tetsüdaktsü adoktsü, anungji iba amala inyakyim yabo sentoka

metoktsütettsü," ta lai ashi. Kim Yo Jong-isa, US tir Joe Biden agütsüogo, shibai North Korea-i nuclear hadir amshitsü amokmerenba ajanga Kim yimsüsüba tatembang dak dangi arudaktsütsü ta ashi. Laisa, US lenir ya onoko mishidak aser tamagütsü nung kanga tasü ita lir, ta ashi.

Biden-i jembiba o ya tambur kati tetezü kechi melei odang jembiba o ka ama sentoka metoktsütsü, ta lai ashi.

"Iba olen ya onok tsükchir tongtiba US indang tiri jembiba lir anungji iba ya amokmeren ka lir aser iba atema onok renema alitsü," ta lai ashi.

Ajisüaka North Korea-i kechi jenjang agütsü sentong yanglua ali, iba indang osang tejangja melemsatöp.

South Korea tir Yoon Suk-yeol aser Biden nati iba hopta Washington Declaration ta nungja agütsür tenangzüktepba ka yangluba sangdongogo aser iba ajanga South Korea nem US-i nuclear teyari agütsütsü, kechiyong Pyongyang-i kanga amokmerenba ajanga linük ana mesüngjemteti lir.

Sangdong nung, küm aika sülen tang mezüngbuba US indang nuclear ballistic submarine kati South Korea indang rongnendak semdangtsüba densema, teti ama strategic assets tem yoktsüba densema lir, ta Washington nungi ketdangtsür kati AFP news agency dang iba hopta ashi.

US indang nuclear hadirtem

South Korea nung amenoka ayutsü kecha sentong mali ta ketdangtsüsa ashi.

North Korea-i hadir balala tendangba aser US aser South Korea military-i exercise balala ayongzüka agiba ajanga Korean Peninsula nung tensa kanga mejungi kümer aliba mapang ka nung Biden aser Yoon ya Washington, DC nung ajurutepogo.

South Korea indang Yonhap News Agency-i Honibarnü sangdong ka ajanga ashiba agi, Kim Yo Jong-i South Korea tir dang tamaji jaogo, aser ashiba agi pa metemsüba ajanga security jenjang kanga mejungi kümdaktsüogo.

2022 küm nungi tang tashi nung North Korea-i missile 100 shi tendangogo, kong intercontinental ballistic missile tem aser short-range missile tem densema lir. North Korea-i ashiba agi, missile tem tendangba ya nuclear amshia South Korea amaktsü asoshi terenemshiba ka lir.

North Korea nem küm aika tenokdangba agütsür liaka parnoki tashi mangar aser maneni tenokdangba agütsür aliba nuclear aser missile programme tem tejakdangi bener aotsü meranga arudar.

South Korea-i unification ministry-i, Kim Yo Jong-i jembiba o ya aitsüogo aser ashiba agi, lai o tamajung jembiba ajanga North Korea koda jenjang tekübokba nung ali iba ji jangja jangja sayur.

# MENUNGRA BILEMTETER

ASÜR S. TIANUKLO LONGKUMER  
Chuchuyimlang Town  
Tasüba Anogo: April 30, 2022



Iba akumlir wadang nungi nai onok toktsür orr küm ka ajungdang onoki na tali menungra bilemteter. Oda alima timtem, tamakok aser tepela süshia arudang na lilasa koda jungla na ta chirnur, semchir, anükapang aser kinungertemi anogo aben menungrar.

Künü kodanga maruba lima nung pelatepa ajuruteptsü sarasadema atar.

# Saudi Arabia & Iran nati embassy tem lapoktsü: Minister



Iran Foreign Minister Hossein Amir-Abdollahian

**Tehran, Rongchii/April 29 (Agencies):** Saudi Arabia aser Iran nati linük ana yimtüba nung anogo ishika tsüngda embassy tem tanaben lapokshitsü, ta Iran Foreign Minister Hossein Amir-Abdollahian-i ashi. Iba ajanga linük ana küm tenet tashi tesendaktep raksar aliba yanglushiba temaitsü sayur.

Lebanon yimtüba Beirut nung Hokolbarnü osangbenertem den sensaksemba mapang Amir-Abdollahian-i embassy lapoktsüba anogo tejangjabo memetetdaktsü liasü, koba 2016 küm shibanga liasü. Linük ana tsüngda diplomatic tesendaktep tanaben amenokshitsü aser embassy tem lapokshitsü asoshi iba ita tetenzüklen China nung senden ka amenba mapang mulungtepa liasü.

"Eid al-Fitr mapang Iran aser Saudi Arabia foreign minister phone ajanga jembiba mapang onoki taruba anogo ishika tsüngda Tehran aser Riyadh nung Iran aser Saudi indang embassy lapokshitsü atema mulungtepogo," ta Amir-Abdollahian-i ashiba osang ajanga metetdaktsü.

2015 küm Iran-i teyari agütsüba Houthi movement-i

Riyadh-i pusemba sorkar atsüngtoka linük yimtüba Sanaa atsüngba sülen Saudi Arabia aser United Arab Emirates nati Yemen rara nung shilem agi tenzüker aser iba ajanga Saudi o Iran na tesendaktep mejungi aküm.

Linük tem tsüngda mangatettep adokba ajanga iba tesem temeket nung tensa mejungi aküm kong Syria civil war desema lir.

Amir-Abdollahian-i Lebanon semdanga Lebanon nunger ketdangtsürtem aser Hezbollah lenir Sayyed Hassan Nasrallah den ajurutepba sülen osangbenertem den sensaksemba mapang iba olen lemsatepa liasü.

Iran foreign minister-i, tir Ebrahim Raisi-i tarutsü nung Syria semdangtsü, ta ashi ajisüka iba dak sendakba nung osang tejangja magütsü.

Iran tiri Syria semdangra Syria nung 2011 küm rara tenzükerba sülen tang mezüngbuba Iran tir kati iba linük semdang asütsü. Iran aser Russia nati military aser rongsenketzüng nung teyari agütsüba sülen Assad-i rara jenjang melenshidakja linük nung tesem timba amokbanger lir.



'Operation Kaveri' kübok Jeddah nungi passenger 300 anir INS Sumedha apusoba noksa nung angur. Sudanese Army aser Rapid Support Forces (RSF) na ceasefire benoker liaka maneni raratepa arudar aser iba inyakyim ngua UN kanga tezü adangba lemsatepogo. 'Operation Kaveri' kübok India nunger 2,400 shi sorkari Sudan nungi aninogo.

## WFI tekolakba Brij Bhushan Singh bushisüngdang atema renema lir



Brij Bhushan Singh

**Rongchii/April 29, 2023 (Agencies):** WFI tekolakba Brij Bhushan Sharan Singh, shiba tetsür tenet tashi-i sexual harassment dak sendakba nung pa anema ken o benoka lir, pai Honibarnü ashiba agi, pa bushisüngdang atema renema lir, ajisiüaka pa mapa nungibo manentsü kechiyong mapa nungi anenra pa anema ken o benoka aliba ya pai agizükba ama kümdaktsütsü.

"Ni aibelena mali aser ni Supreme Court aser Delhi Police dak tamang akar. Ni bushisüngdang mashi ka asoshi renema lir," ta Singh-i Bishnoharpur nung par kidang osangbenertem den sensaksemba mapang ashi.

"Wrestling Federation of India tir mapa toktsütsü ya kü

atema kecha balaka masü ajisiüaka ni ozüing raksar ka amabo mapa nungi manentsü," ta pai ashi.

Congress lenir Priyanka Gandhi Vadra-i Honibar anepdang wrestler tem semdangba dak sendakba nung Singh-i, "iba mepetmesü ya shiba adokdaksü aji tanü nguogo. Ni tetenzük nungi iba ken o nung industrialist ka aser Congress densema lir ta shiogo. Parnok kü dang mepelar," ta pai ashi, ajisiüaka osang tejangja magütsü.

Priyanka Gandhi-i New Delhi kübok Jantar Mantar nung wrestler tem semdanga parnok khuret lemsatepogo aser WFI tekolakba kümzüka ayuba atema sorkar aitsüogo.

Hokolbar aonung Delhi

Police-i Singh anema FIR ana benokogo. Mezüingbuba FIR ya minor wrestler ka dak sendaka lir aser ken o ya POCSSO Act kübok züingoksemogo aser tanabuba ya sexual harassment dak sendaka lir.

"Ni ozüing raksar ka masü. Mapa nungi anenba tetezü ni iba taitüsü ya agizükba ama akümtsü," ta Kaiserganj nungi BJP MP yagi ashi. Paisa, tetsür wrestler temi akhangba ajak agizükogo, ta ashi.

"Ni anema FIR ka benokogo, ajisiüaka kechiba parnoki maneni longkak aiter?" ta pai asüngdang.

Singh-i term ana tashi WFI tir mapa benogo aser tir tasen ka shimba sülen mapa toktsütsü. Pa election magi tashi "caretaker" shilem agidar.

## Marco Reus-i tenangzüktepba tasen yanglushi



**Berlin, Rongchii/April 29, 2023 (Agencies):** Bundesliga nung temaba jenjang nung aliba team, Borussia Dortmund-i captain Marco Reus' den küm ka atema tenangzüktepba yanglushiogo, ta club sangdong ka ajanga metetdaksü.

German Footballer of the Year anaben tashi ngur aliba asayar indang contract ya iba season tembangba sülen tembangtsü liasü. Arishi küm 33 tain Reus-i Dortmund nungi asayaba mapang goal 161 idaktsür lir aser Adi Preissler-i 1946 aser 1959 küm tsüingda goal 177 idakja otsü tasen yanglur aliba meneptsü atema

goal 16 dang nüngdaker.

Reus-i Dortmund nungi asayaba mapang German Cup ana koka lir saka league khen danga koka mali. Pa 2012 küm Moenchengadbach nungi arua Dortmund nung aden.

Taküm Dortmund pur asaya pongu asayatsü anunga lia Bayern Munich dang nungi point ka agi timba liasü saka taoba asaya draw asüba ajanga parnok jenjang mejangi kümogo. Reus' Dortmund nungi season ter asayaba mapang Bayern-i dang season ajak koka liasü.

"Fan tem ajaki ama team ama onok mulung nung nükjidong tulu yua lir aser onok ajak rangloker lir. Onok German champions kümner," ta Reus-i ashi.

"Ni ano küm ka atema tenangzüktepba yanglushi atema kanga pelar. Ni kü indang career nung Dortmund dak alaka tanga club nungi masayaner ta shia aruogo," ta paisa shisem.

Reus-i, pa Dortmund nung

asaya-a lia career tembangner ta shia aruogo aser tang tenangzüktepba yangluba tembangba mapang tashi nung pa arishi küm 35 junger alitsü.

"Marco ya club, fan tem aser yimti atema kanga tongtibang dang masü saka alima ajunga nung onok fan tem atema kanga tongtibang lir," ta sporting director Sebastian Kehl-i ashi.

Reus ya Dortmund nung aso aser pa club junior team nung asayaba sülen Rot Weiss Ahlen-i ao aser maneni Borussia Moenchengladbach nungi asaya, kong pa mezüingbuba Bundesliga nung asaya liasü.

Reus ya 2012 küm Gladbach nungi Dortmund nung arua aden aser 2018-19 season metenzük tsüingda pa nem club captain mapa abentsü asoshi nongloktüsü.

Pa Germany team nungi 48 ben asaya lir aser iba mapang pai goal 15 idaktsüogo. Ajisiüaka pa yiruba ajanga Germany-i 2014 World Cup akokba densema asayamung tongtibang aika nung shilem magitet.

Kasa mapang nung pa September ita tetsüing teloktep yiruba sülen hopta aika masayatet, kong Qatar World Cup campaign densema lir. Ajisiüaka pai iba season nungbo asaya 26 nung assist 7 süja lir.

## Ronaldinho-i Worldwide Street Football League amenoktsü

**Rongchii/April 29, 2023 (Agencies):** Brazil nunger nüngtugu asayar Ronaldinho-i worldwide street football league ka tenzüksü sentong lir. Iba league ya sempet aketba lanur asayatem nem parnok sempet sayatsü atema maongka agütsütsü aser taoba Barcelona nungi asayar ama nüngtugu kümdaktsütsü asoshi maongka agütsütsü nükjidong nung tenzüksü sentong lir.

Ronaldinho Global Street League ya 2023 küm tatemlen tenzüksü ta asayamung ayongertemi Honibarnü metetdaksü. Asayamung tetenzük nung social media tryout process ka alitsü, kong arishi küm tatakzük kecha makai yimtung nung asayaba asayatem parnok indang skill aser tricks tajungtibatem upload sütettsü aser iba dak ajemdaker parnok team tem nung densemetsü asoshi maongka angutsü.

Asayatem aser skill tetoktepbatem alima ajunga nung tongtibang yimitem nung

asayatsü aser team tem "RGS� Champions" title atema league ka nung tokteptsü aser Ronaldinho Globe Street Team ta nungja agütsür aliba team nung adentsü asoshi maongka angutsü.

Ajisiüaka asayamung kong asayatsü mesüra kodang tenzüksü iba indang osang tejangja agüja mali.

Ronaldinho, shibai world player of the year anaben tashi agizükogo, pai sports agent aser taoba mapang asayar Roberto de Assis Moreira aser Sophie Watts (Mike Tyson's Legends League co-founder) nunger den league amenoktsü atema longjemogo

"Ronaldinho künaprongla Brazil nung sensaktia nung intet. Künati lanurtem ajungkettsü atema yimtung nung football asayaba ya koda tongtibang aji meteta lir aser RGS� ajanga alima ajunga nung yimtung nung football asayatem bushiteta parnok nongita yaritsü atema onok bendanga agütsür lir," ta Moreira-i ashi.

## Medvedev Madrid Open tasembubura round-i iogo

**Rongchii/April 29, 2023 (Agencies):** World number three asayar Daniil Medvedev-i Honibarnü Andrea Vavassori 6-4, 6-3 agi koka Madrid Open tasembubura round-i iogo.

Spain yimtiba nung iba asayamung nung Vavassori-i mezüingbuba round nung Andy Murray tsükdaktsü saka tanabuba round nungbo Medvedev majangteti liasü.

Rank 164buba nung aliba Italy nunger asayar yagi kanga meranga asaya ajisiüaka asaya mekoktet. Asaya tepeyong pai pa indang serve aser volley game agi Medvedev nem timtem agütsü ajisiüaka tamakok angu.

"Ni kanga junga asayaogo ta bilemer aser ni break points kar kümzüko," ta Medvedev-i asaya tembangba sülen ashi.

"Ni maongka kanga junga agiteta asayaogo aser taruba asaya nung shilem agitsü atema yongya atar," ta paisa ashi.

Italy nunger asayar yagi mezüingbuba game nung Medvedev indang serve anaben tashi break asütsü asoshi maongka angu saka Medvedev-i kanga junga nokdangtet aser Andrea indang serve ka break süa 6-4 agi mezüingbuba set akok.

Tanabuba set masaya tsüingda tzunglu aruba ajanga



Daniil Medvedev

mapang tatsüka masayateti liasü, ajisiüaka asaya tenzüka sülen Medvedev-i asaya kanga junga asayateta 5-3 agi tanabuba set-a akok.

Russia nunger asayar, shibai clay court nung junga masayateti arudar, pai iba asaya ya Vavassori-i back hand agi clurt adena ball züktokba sülen akok.

"Ni kanga jangradema asayaogo aser rally asayaba mapang ni asaya amokbanger asayar ama bilema liasü aser iba ya clay nung asayaba mapang kanga tongtibang lir. Asayamung tepeyong yamai dang asayatsü imla atar," ta Medvedev-i ashi.

Tasembubura round nung pa Alexander Shevchenko den asayatsü, shibai Honibarnü 6-1, 6-1 agi Jiri Lehecka madak takok nguogo.

## BILEMDANGANG

"Pei akaba makaba tangar den medemdangra pela malitsü."